

摛藻堂四庫全書薈要

集部

欽定四庫全書會要

集部

仲弘集卷八



詳校官助教臣謝登雋

欽定四庫全書

會要卷一萬六千三百九十一

集部

仲弘集卷七

元楊載撰

舟次池陽偕通守周南翁燕表姪陳和卿家席上
贈歌者

故人相見話綢繆三日江干繫客舟高燕未闌明月上
豔歌初轉彩雲留光搖崖巒寧知夜字寫邊鴻已報秋
底事尊前能盡醉為伊肯展翠眉愁

簡松江汪知府

君為郡守屢豐年能使歡聲塞市廛泮水薦游聲甚美
釣金並入聽無偏漁河夜集千家網煮海朝凝萬竈烟
賓客况聞才子盛詠歌宜屬後人傳

壽姚國公

可樂無如父母全既賢既貴又長年金壺賜出青雲上
玉佩朝辭白日邊楚木論春猶五百蟠桃稱壽必三千
似聞黃綺歸來後長向山中作地仙

武當山張真人

張公被髮下山來欲為神州救旱災
感召上天垂雨露指揮平地起風雷
槁苗再發還堪刈枯木重榮不假裁
受詔即思歸舊隱瓊樓玉殿繞崔嵬

奉呈左司張元朴郎中

上相登庸求佽助明公秉德動觀聽
旂常大法藏清廟玉帛彌文薦外廷
欲立高名垂宇宙須知雅量配江溟
鯀生論事非晁董盡力還堪備使令

贈惠山聖長老

道人卓錫向名山路絕巖頭未易攀海上潮來風浩浩
洞中雲出雨潺潺松柟直起參天碧苔鮮旁行匝地斑
籍甚後人蒙法施有如流水注蒼灣

寄曹雲西

羨君卜宅遠紛龐長把絲綸釣大江菰稻色枯雲慘慘
艾荷聲急雨淙淙消磨歲月書千卷傲睨乾坤酒一缸
甫里當年遺帙在交鋒那肯豎幡降

送師總管

使節南來寵渥新漢家京尹擇能臣金爐香暖迎丹詔
玉陛霜清謁紫宸已用嚴威摧酷吏更推仁政澤齊民
知公夙抱經綸志多立功名繼古人

題景德寺雲谷老師宜月軒

月入中庭欲睡遲況逢秋夜特相宜十分陰魄凝中氣
五色祥光溢上規影漬金盃須滿汎風生玉笛任橫吹
老禪心地元虛寂更想高簷獨坐時

送趙伯常

君如寶玉不磨礪
吐氣騰騰作白虹
外戶將迎皆美士
前途推挽必名公
鷄行不獲朝參共
燕坐猶能獻酢同
我想東歸心正切
奮飛偏羨挾秋風

重陽日作

客中佳節罷登高
獨坐悽然感二毛
紫陌泥塗秋泊泊
黑山風雨夜嘈嘈
幽人侈有觀魚樂
壯士慚無汗馬勞
得喪古今都一律
唯應痛飲讀離騷

贈善畫沈處士

繪畫時賢屢逼真謾於城市老間身孰知麋鹿臺前客
解寫麒麟閣上人種樹十尋知閱世滋蘭百本喜逢春
詩成有愧丹青引獨使曹劉負絕塵

送戴尊師入越

躍馬年年塞北遊春風此日送歸舟山中樹老飛玄鶴
江上莎長卧白鷗欲與謝公同隱逸肯容賀老獨風流
山陰道士如相見沽取村醪醉未休

簡李可度

從來憲府擢羣英，攬轡雍容按百城。鶻鶚逢時方厲疾，豺狼避道敢縱橫。每崇實政除民瘼，肯假嚴威駭物情。君有美才當進用，竚聞雅譽達神京。

贈戴鑒

推測陰陽術已精，研窮問難更通明。山中說劍仍聞道，市上懸壺即治生。蛇為銜珠知藥聖，犬因舐鼎驗丹成。上鑒鑒國為君可行載輶車入帝京。

贈王止善

不見故人十年餘況復往來音問疎倏然携離事何限
即此歡會情如初不愁官卑少俸粟第恐年長廢讀書
隨羣逐隊祇可厭秋風共釣長江魚

次韻吳生見贈

早入儒林衣鵠袍淋漓杯酒謾稱豪愁來客路烟沙遠
夢斷仙山雪浪高魯望浮家名獨著君平賣卜志仍操
和詩不足酬佳贊孰謂瓊瑤報木桃

贈雲上人

道人庭戶閟烟霞誦習微文願力加萬法莊嚴充世界
一音演說被河沙聰光盡日搖松葉履迹長年沒蘚花
解后有言還契合緬思同會結龍華

卜畊宋徵士

古人命卜極精詳苟得神龜必寶藏介胄在天兼赤黑
圖書隨地列圓方大而元氣求乖合細則人為驗否臧
家食如君知此術耕耘何事竟凶穰

送周用章

君行萬里赴京師
凜凜風霜及此時
第挾簡編辭白屋
遽承袍笏會丹墀
宮花插帽知恩重
御酒沾唇覺醉遲
必有三篇侔賈傅
上陳王道正民彝

送陳堯卿之京師

欲擣三策扣天闔
萬里程途未易論
彈鋏幾年依客舍
曳裾何處覓王門
夜闌孤館聽殘漏
春入長河辨舊痕
文采似君宜得意
要津何患少攀援

登邵氏宜晚樓

曾入明光捧御筵歸來山澤伴儒仙驅馳已出紅塵表
締構還依碧嶂前豁達軒牕吞宇宙嵬峩梁棟接雲烟
憑高眺望尤宜晚屏障橫開紫翠連

呈馬昂夫僉院

君為胄子入京都才望高華世所無祕殿為郎監玉篆
雄藩作守判銅符科條自可甦民瘼議論還宜贊聖謨
更倚覃懷功業盛巍巍天柱立坤隅

次韻錢翼之

有聲吳下頗多年長把漁竿釣海邊李賀才名過杜牧
魯公書法繼張顛塵沙撲面驚吾老星宿蟠胸愧子賢
歲晚著書言道妙青青林竹正宜編

賦飛鴻送胡則大

年年客裏見飛鴻成陣成行上碧空杳杳江湖尋故侶
蕭蕭蘆葦下新叢翹翔已出雲霄上飲啄寧來沼沚中
今日似君歸去好扁舟一夜起東風

賜宴謝恩

恭承明詔策羣英欲為斯民致太平孔孟教人先禮樂
申韓操術尚刑名混同已正千年統恒久方觀萬物情
勿謂成周多吉士朝陽亦有鳳凰鳴

送劉長卿張伯起二公歸閩中

去來蹤跡固相違邂逅今朝共載歸欲效駢蛩俱北上
復誰鴻鵠向南飛乍離江上芙蓉幕還著山中薜荔衣
所羨二君才氣盛願聞玉屑吐霏霏

奉美劉侯

蘇白風流迹未賒
賢侯相繼事堪誇
史書日覽三千牘
民版春登百萬家
遊寺已諳松下路
泛舟頻醉柳邊沙
要知為政多恩澤
看取庭前丹桂花

次韻蕭君用

崔嵬出水翠雲浮
輿轎控舟豈厭遊
潭漫渠河方涉夏
蕭條竹樹已迎秋
銜杯興盡人先醉
舞劍歌長客易愁
八月江湖翻渤澥
長竿更約與君投

送殷國華之和州

送君行李欲何如楚國蕭條戰伐餘西塞人烟連草莽
南江風浪入空虛遺民少作先王服故府徒存博士書
舊事到今多泯滅好從黎老問從初

遣興

庭樹號蟬日已涼塞雲橫鴈夜何長挾書萬里干明主
仗劍三年別故鄉西北諸山連朔漠東南衆水隔荆揚
淹留不去慚蘇子莫遣貂裘壓雪霜

湖上

秋郊縱步却驂驥勝事能多許客參如雪萬家收早稻
未霜千樹著黃柑鼈鳴海上潮先湧猿叫山前霧欲含
放浪漁樵元有處使人猶愛住江南

贈沈子成

學琴年少已知名揮弄和柔指法精秋塞乍聞鴻鴈叫
朝陽還聽鳳皇鳴幽人隱几中情適壯士投戈宿憤平
此日有虞興至治南風一曲解同聲

偕汪侯宴舟中

中流畫鷁獨翹翔暫勒鳴騶駐岸傍風引錦帆衝野色
波隨蘭棹汎晴光草涵宿潤珠璣滑麥漲春雲餅餉香
何事乘槎之海上問津從此達天潢

偕鄭尊師飲余氏池亭

池亭翼翼午風涼隔岸田疇穉麥香碧水千尋鷗蕩漾
青天萬里鶴翱翔藏書不為傳孫子學道還宜應帝王
獨行似君何可得結交晚歲獲求羊

竹所為余隱君作

奇君負郭定幽居多植修篁數畝餘結實已期棲鳳鳥
垂綸仍欲釣鯨魚揭竿對戶思排戟截簡盈筐備寫書
清響繁陰皆可愛炎天飛雪滿庭除

贈月桂庭長老

婆娑影滿一輪中普照人間不計功金色光明涵世界
玉毫相好現虛空開時已與羣芳異出處難將衆木同
萬里青雲方得路遨遊願入廣寒宮

送王仲致舍人歸閩中

鳴騶擁道去翩翩欲詣閩中拜墓田伏虎為司樵牧禁
蟠螭著代鼎彝鷄上公復世儀文備胄子承家問學專
冢舍驟興循制度大書史冊必流傳

用左轄郝公詩韻寄曹雲西居士

姓名藉甚冠清流處世還同貉一丘干木道高寧仕魏
子房身退尚封畱靜依杉竹營書室深入蕖荷理釣舟
乘興每思陪笑語揚帆萬頃泛清秋

送劉希孟赴曹雲西招

吳郡唯君善鼓琴曾於律呂用情深和聲細潤鶯遷木
奏響清圓鶴在陰素習已能除俗調靜聽真可禁邪心
相知賴有曹居士為產從茲過十金

送葉顯仁任衢州錄

吾鄉文雅舊彬彬再遇時清喜有人鳳沼已聞鈜衆選
熊蹯無愧用賢賓橫經辯論超周列奉檄光華及老親
姑蔑到家三百里告歸晨省莫辭頻

暮春遊西湖北山

愁耳偏工著雨聲好懷長恐負山行未辭花事駸駸盛
正喜湖光淡淡晴倦憩客猶勤訪寺幽棲吾欲厭歸城
綠疇桑麥盤櫻筍因憶離家恰歲更

題夏氏濟饑詩卷

木饑火旱際荒年百姓流離狀可憐往往富人心似鐵
纍纍餓殍口生烟此時顆粒無沾丐是歲鄉都少棄捐
天道神明如鑒在宜令夏氏子孫賢

謝曹雲西菊

聽鶴亭西處士家中園萬本值秋華攜鉏歲歲根株茂
載酒時時興趣嘉已散白英凝曉露更敷紅艷照晨霞
新題料得篇章富肯示同遊細細誇

題沈氏東陽義塾

並海蒼涼建學宮雲端百里現青紅東南多士題詩徧
西北諸儒坐席通求道每加操守力明經深著討論功
流傳後世光華盛事與南京戚氏同

謝曹雲西寄菊花

君種菊花兼五色能令秋日勝春時
香浮瑣萼和金屑光射園林列錦帷遠水波寒凝慘淡嚴霜節
届厭離披淵明去後踰千載猶有斯人把一枝

寄無錫倅劉雄飛張景亮二使君

閱閱俱高負美名共分符竹守江城帆檣密送遮天影
鐘鼓遙傳動地聲木落西山愁歲宴禾登南畝慶秋成
知君佐政多恩惠側耳邦人頌太平

次韻羅雲叔雪中見寄

目前坑塹已平填此日封姨復弄權略
約未通溪上路輶輶方陷漠南天寒侵兔窟
愁山鬼凍合龍宮逼水仙堪羨廣文
才力壯詩成並和轉清妍

贈張相師

縉紳往往識名流歲宴猶為汗漫遊
自許唐生知蔡澤欲干季布禮曹丘
囊詩價重聯珠玉匣劍芒寒射斗牛
輦轂諸公爭致士江湖何事更淹留

次韻汪復心主簿

秋霜壓鬢似相陵
喚父呼兄乍肯膺
厭采黃花延醉客
喜焚柏子待禪僧
驟登臺閣期君可
久困塵沙歎我曾
二子說聞俱好學
鵬程萬里羨飛騰

送方天瑞釣臺山長

富春江上釣臺高
傍築書堂處俊髦
要為鄉閭施教化
更因山水暢風騷
蘊鹽供養寧嫌薄
朱墨研磨肯憚勞
至日菊花黃滿地
淋漓觴酒任君操

高沙朱山甫挽詩

何勞閑市稅魚雞歸去山中樂舊棲瘦杖穿雲登峻嶺
小舟乘月泛清溪無僧扣竹茶仍煮有客尋花酒亦攜
江海風流今已矣孤墳愁見草萋萋

送高子盤初菴山長

文行繇來著本根芳菲何異殖蘭蓀諸公籍籍多相許
凡子區區不足論書館已能更士習翰林併可代王言
明年復應求賢詔必掇高科奉帝軒

題張氏順堂

厥宗好德繇先世門內曾無害氣侵春鯉上盤瑣白玉
夏蠶登箔鑄黃金兒長愷悌求書帙女大妍妍弄繡針
彼美堂名從此得固應長句為君吟

遺興

庸人往往慢吾曹汨沒空嗟命不遭死後欲畱千載譽
生前須作萬人豪倦遊闢塞身將老悵望雲天興漫高
却恨素無田二頃欲乘春雨藝東臯

用左轄郝公詩韻寄曹雲西居士

羨君祕學治玄玄黃老遺文有自傳不與宛駒爭萬里
漫隨遼鶴歎千年橫編每欲論今古中酒何勞問聖賢
甫里似聞杭稻熟舉家還泛五湖船

題胡伯衡飛雲圖

未應時命固相違千里遨遊久不歸已占龍頭承紫詔
更嘶馬首賜朱衣塵沙客路牽愁遠泉石家鄉入夢稀
日夜思親心更切滄浪悵望白雲飛

元日早朝次韻辛良史

掖垣迢遞到城回
魏闕嵯峨此日開
赤帝會庭宵仗引
朱輪爭道曉鐘催
三泉忽報歲金甲
萬歲徒聞獻玉杯
樂奏象箭從此畢
小臣思見鳳凰來

歸至丹陽宿逆旅主人夢作燕子詩

燕子歸來意何當
羽毛初刷仍煌煌
孔鸞相望不我與
鷹隼有知那汝傷
晴雲淑郁鳴上下
春院芳華飛韻顚
莫言帝力遠微物
長發曾聞興彼商

送吳真人二首

具嚴威命領祠官歷祀名山不厭難上帝乘龍遊下土
真人騎鶴降虛壇已刊白玉為封檢更鑄黃金作祭冠
國壽延洪千萬歲願祈穀熟小民安

又

子紹重黎有大功父宜封建至三公絲綸詔下皇恩重
黼黻衣成古禮崇視草乍聞辭玉府獻桃曾見到珠宮

有關
便與彭籛得壽同

題貢氏秀野堂

貢氏諸郎皆好學南湖舊有讀書堂波濤已逐鯢鯨化
霧雨猶聞虎豹藏龍上麥禾春娓娓谷中杉桂曉蒼蒼
君卿雅有當時望八十能來佐漢皇

次韻張仲實除日聞鵲

奕世侯門能載德微如鳥鵲到今馴雕簷曉日鳴聲好
綠樹春風鼓翼頻雲漢有愁天欲近昆岡見抵俗難親
主人定有除書至貴爾先知及上春

吳山晚眺

山椒聳構四垂寬上相旌旗會覽觀傍近江湖天廣大
上連星斗地清寒龍宮永鎖函書闕鳳嶺重嗟莞樹殘
此際獨無雲蔽日正宜翹首望長安

次克明韻贈劉時中

循行郡國弗遲遲宣布新條及盛時民俗要令無狗盜
人才今喜得牛鑿牕間夜雨銷銀燭門外春雲壓彩旗
左右湖山都未覺好分餘力治文辭

潮

潮頭初起壯何如
如阜如岡乍有無
高浪駕天龍出沒
疾風吹樹鳥譁呼
陰陽莫測機相軋
朝夕初生信不渝
海石向來誇水德
已應傾倒盡歸墟

次韻袁德平苦雨

二月雨霖無乃早
園林誰復辨青紅
浪花汨汨還登岸
雲葉翻翻久亂空
水落巖崖通鳥道
墅流檣翳塞龍宮
只今海上尤空濶
願踏浮槎逐釣翁

遺興

門前高柳綠紛紛戀靄留烟晝不分雨砌芳菲晴後見
風颸言語靜中聞桐花可作鳳凰食竹葉還成虎豹文
但使此心無外慕卜居何日絕人羣

雪

急霰中宵響瓦牕寒光未曉入牕稜橫飛朔野威風壯
盡壓西山氣槩增蟻酒佐歡唯弟共貂裘縱獵豈吾能
如今何處堪游目葛嶺浮圖最一層

夏夜對月

暑天煩倦唯酣寢薄暮登樓起宿疴簾報新秋涼意早
牕開永夜月明多不眠孤鶴頻驚叫好事流螢屢見過
安得泛舟江海上坐觀冰鏡落滄波

送方仲永為重慶路校官

君有英才世罕徒矯然如鶴上天衢長懷道藝干明主
却恨衣冠累鉅儒愁裏論心相慰藉醉中發興共歌呼
此行萬里官西蜀有問長因竹使符

次韻劉時中見寄

泥塗霄漢固難謀亦有元龍百尺樓籍籍圖書聊自適
茫茫江海與誰遊但聞燕市能求馬肯向秦川輒飯牛
富貴不才名盡滅未應摧沮恨淹留

遺懷

往歲銜杯意氣疎願隨童子誦詩書久荒靖節松三徑
獨守揚雄宅一區春圃花殘收夏果海門潮落買江魚
如今也足成吾趣何事王門作曳裾

仲弘集卷七

欽定四庫全書薈要卷一萬六千三百九十一

集部

仲弘集卷八

元楊載撰

題高尚書竹石

矯龍疑蒼筠踞虎肖白石倘乘風雲會變化那可測

趙浚儀公竹石

老竹倚危石比德猶弟兄凌競度霜雪然後大節明

王晉卿古木

走根坼裂石曲榦漸清漣雷電忌交作化龍起重淵

墨蘭

謂香辭追求曰色却媚愛執德非固然何用結為佩

墨蕙

與蘭大相似多花花蕊蕊在古象何人孤竹君二子

題松雪翁墨竹

二首

衡蘭倚修竹寂寞生幽谷比德如夷齊於此受命獨

又

側石狀奇峭橫竹枝扶疎猗蘭復參立信哉德不孤

題墨竹四首為鄭尊師

飲霧初泠泠沫雨還旆旆相從采真遊可作晤語對

又

蔽日訶無影疏風疑有聲移根來室中尚假筆墨精

又

虛心可遊世直道難事人伯夷聖之清信哉德有鄰

又

風味既澹泊顏色不妍媚孤生崖谷間有此凌雲氣

畫竹二首

翡翠含春霧琅玕振曉風清聲來枕上秀色入簾中

又

萌芽成虎豹變節作蛟龍正直唯吾與清修一作操必子

從

客中即事

五首

漸覺星星兩鬢皤推愁不去奈愁何客中忘却春光度

驚見前林嫩竹多

又

終朝矻矻坐書帷春去春來總不知怪得山禽如有意
隔牕撩亂踏花枝

又

幾日懸懸雨不休客牕孤迥使人愁杜鵑啼切知何處
坐對雲山萬木稠

又

美木千章遶故宮如烟如霧塞虛空路衝南北山岡斷
披拂能來萬里風

又

遠望潮頭出海來直衝西岸復東回鷗夷萬古畱深恨
如此波濤亦壯哉

悼鄰妓

三首

西子湖邊楊柳花隨風飄泊到天涯青春遇著歸來燕
銜入當年王謝家

又

金沙灘上觀音面刲火光中幻化身抱取摩尼却歸去
天衣元不汚風塵

又

一種腰肢分外妍雙眉畫作月娟娟春風吹破裏王夢
行雨行雲若個邊

種柳圖

連山斷岸古今同彷彿柴桑入望中為問江邊枯柳樹

飛花幾度亂春風

趙松雪畫蘭竹石

石上蘭苔已蔚然，竹枝相間復娟娟。
正如王謝佳公子，文采風流並世傳。

謾題

都門幾度見秋風，楓柘連山樹樹紅。
江海此時回首望，黃花滿地酒樽空。

贈陳相士

二首

英豪無處覓知音奔走塵埃嘆陸沈他日預言當富貴
相逢何惜贈千金

又

江湖茫茫眼欲空尋常貴賤相多同低頭強與時人語
蹤跡徒勞逐轉蓬

棘林圖

村北村南隔暮雲滿林黃葉亂紛紛楚江回首三千里
過鴈如今不可聞

沙鴈

漠漠寒烟樹影微一行沙鴈背人飛江南江北秋將盡
客子如今猶未歸

題應中父所藏陳仲美山水小景

層巒疊嶂倚晴空松檜相連秀色同下有幽人茆屋在
浩歌宜屬紫芝翁

扇上竹

種竹何須種萬竿一枝分影亦檀欒秋宵更受風披拂

聽取清聲入夢寒

題高尚書墨竹

尚書善畫名天下戲掃修篁筆更奇何異補陀巖石上
雪霜摧折有殘枝

聽琴圖

繇來六律妙難知聖德巍巍亦有師欲向琴中求至理
相從虞舜五絃推

讀碑圖

老聃自負知無窮文藝兼求事事通獨忌楊侯才勝已
陷身令入網羅中

水仙花

花似金盃薦玉盤炯然光煥一庭寒世間復有雲梯子
獻與嫦娥月裏看

題雪竹圖

飽經霜雪性堅強拔起危梢百尺長大節挺然難屈撓
渾如宋璟立班行

題風竹圖

屋後屋前皆種竹
中宵無奈朔風號
似維舟楫滄江上
裂岸崩崖聽怒濤

題息齋竹

老節嚴嚴若自持
翛然分影覆堦墀
此君不受纖塵汚
更看清朝雨過時

雷泉

石崖深處有潛龍
奮起春雷不見蹤
自此白雲山下路

流泉一道響淙淙

次韻康子山舍人

二首

薰旬風雨氣寒涼院落幽深草木長却喜今年多夏果

碧苞丹實滿林香

又

欲賞秋花色已涼碧雲散盡楚天長姮娥舊種無多樹
何故人間有此香

題鍾呂傳道圖

濟世曾聞有大才超然脫屣去塵埃劍光昱昱今何在

上下乘龍戲九垓

到京師

城雪初消蘿菜生角門深巷少人行柳梢聽得黃鸝語
此是春來第一聲

送人

二首

客路逢春雪乍消眼前愁思轉相撩垂楊染作黃金色
舞遍東風萬萬條

又

金溝河上始通流海子橋邊繫客舟却到江南春水漲
拍天波浪泛輕鷗

畫竹石

二首

林前怪石起參差篁竹叢深使客疑如過瀟湘江上路
鶴鵠啼罷日西時

又

息齋道人能畫竹攬結造化歸毫端偶從紙上得一個

大勝渭川裁萬竿

宿浚儀公湖亭四首

夜宿湖亭水氣涼四更風露濕衣裳空濛霧重前山暗
屋角斜明是月光

又

兩兩三三白鳥飛背人斜去落漁磯雨餘不遣濃雲散
猶向前山擁翠微

幾年鄉夢隔江湖此日登臨興不孤小艇欲行無遠近
不愁歸醉要人扶

又

能文亦有張公子往歲俄加道士衣載酒白雲山下路
擬將毫翰與同揮

題十二紅卷子

碧桃枝上有珍禽調舌交交聽好音畫出江南春意思
明年攜酒共追尋

題巨然秋山

山色嵯峨樹老蒼筆端描邈辨毫芒從來名下無虛士
可與荆關作鴈行

題鄭子貞畫像

二首

外姓爭權國必危若人有道獨前知倘緣辟召登朝著
忍見他年漢鼎移

又

躬耕谷口雜編民寧肯懷金媚賊臣揚子解言如許事

不知孰載是何人

次韻陳又新真人北上

驛騎翩翩祇斂歸壽觴捧罷憇
憇慈闌秋風萬里闊河道
回首那堪翔鴈飛

贈高如山

江行矚望多奇絕疊壁重崖翠倚空此日如山相邂逅
皓然秋鬢一衰翁

題畫兔呈馬伯庸學士

姮娥乞與長生藥自可騰空入月中竊食草間多利害

饑鷹奮擊待秋風

喜晴

樓外斜陽放晚晴街衢前後聽歡聲迴舟更倚南風順
千里青山照眼明

題廣寒龍先生詩卷

三首

匡廬山下有仙翁壽與乾坤配始終記得霓裳羽衣曲
此身曾入廣寒宮

又

人事休祥靡不知道高曾作帝王師龍顏大悅承天寵
長記麻衣上殿時

又

古來聞有列仙儒栖宿巖巒道味腴度世直須功行滿
乘龍飛去侍清都

題倪御史墨帖

二首

官府移文存大略僧家常住守清規祇令坐奪齊人食

嘆息浮屠亦少衰

又

唐季朝銜亦漫加長憂羣盜亂如麻子孫奕葉猶昌熾
知是當年積善家

紀夢

二首

四面青山擁翠微樓臺相向闢天扉夜闌每作遊仙夢
月滿瓊田萬鶴飛

又

紛紛鸞鶴滿虛空耳畔如聞度海風直上雲霄千萬里
此身飛入紫微宮

題溫日觀葡萄

二首

老禪嗜酒醉不醒強坐虛櫺寫清影興來擲筆意茫然
落葉滿庭秋月冷

又

醉中捉筆兩眼花倚簷架子欹復斜翠藤盤屈那可辨
但見滿紙生龍蛇

題墨竹二首

嶰谷陰寒石如鐵二龍僵立露骨節春雷動地萬物活
畏汝飛騰衝石裂

又

攢青聚綠生巖幽海濤聲引風颼颼年年三伏林下卧
白晝慘慄如深秋

用韻送德陽入越為贊壻二首

從來浪迹信流槎始至山陽便作家不與淮王援桂樹

應隨越女採荷花

又

輕霞薄霧詰朝晴岸柳江梅著樹明更向若耶溪上聽

傍人歌唱盡春聲

次韻子正雪中雜興

四首

天宮何事又飛花欲以文章起作家坐想玉堂風味在

赤銅官鼎試春茶

又

舊說曾城玉為樹千樹萬樹遠仙家又須天上春風早
想見飄零如此花

又

姑射仙人玉佩裳周流天地有輝光但令穀熟不疵癟
未受人間黍稷香

又

寂寞寒儒半畝宮堆瓊積玉未為窮向來得此成奇觀
一任衡門動健風

題子行所藏魚藻圖

畫出僑魚戲綠漪羣分小白更相隨主人真得蒙莊趣
視此洋洋樂可知

題宣和畫爵

蕞然微命出蓬蒿飛躍無踰數仞高阿閣鳳皇行關此

畫渠能使聖躬勞

又

一爵翩然飛且鳴翎毛嘴爪若天成遼陽一往無消息

猶得人間著畫名

次韻雪

三首

若有神人為散花
往來揮灑任橫斜
乘龍忽忽行天上
何不斯須過我家

又

初上衣裾細細花
老松俄頃半枝斜
高林窮谷無行徑
敗壁頽簷有住家

研光帽子舞山花吹落層城萬仞斜安得廄輪為我駕

一時飛到列仙家

題曾氏墳山詩

漫漫平田一望中前山突起勢寧崇千年畱得孤墳在

紙為州人敬魯公

題三生圖

一生曾歷萬生多貴賤賢愚變幾何更向此身存業識

茫茫大劫鉅消磨

雲林雨霽圖為瞿澤民賦

麗澤乘時灑八荒歸雲杉杪尚悠悠揚齊民亦有豐年望
豈但陳陳問太倉

山谷帖

古來君子重親親欣戚相於此意真再拜先賢遺墨在
弟兄鬪閱是何人

趙承旨帖

書名世仰浚儀公望重朝廷品秩隆今日後生思倣倣

臨池須費十年功

陽關圖

咸陽西距玉門關
萬里征人憚往還
此別尊前須盡醉
相逢俱是鬢毛斑

春山圖

春山流水暗涓涓
發斂朝雲與暮烟
更背奇峯千萬仞
不愁無處學神仙

集虛

虛室還能致吉祥唯嫌六鑿互相攘百神受命皆來舍

豈假乘雲入帝鄉

偶題二首

巨木埋根數百年蔚然蒼翠上參天不歸宮闕充梁棟
也作龍舟濟大川

又

海上雲來徧地陰波間漏日濶黃金水車倦踏傷淫潦
無奈連天雨正深

畫枇杷

四月江南盧橘熟離離佳實滿枝黃丹青偶向圖中見
漬蜜猶思配一觴

偶題

藏名匿迹黃塵中日抱書案心冥濛牆頭花變兩三色
又是一年看春風

清溪

霧擁春郊白晝昏清溪路斷客銷魂更憐把釣衝風雨

欲與漁翁共一樽

喜晴

簷外喧喧雀報晴夕陽猶照小牕明迴舟更倚南風順
要聽田家打麥聲


題沙總管屏風

驚濤奔衝山震動靈液滲灑樹滋長襲肌或怯寒吹搖
入耳如聞怒雷響

畫馬

天家祖狡骨骼奇朝飲暮秣必以時世無造父能駕馭
直欲弄影舞瑤池

仲弘集卷八



總校官庶吉士臣張能照
校對官中書臣方維甸
謄錄舉人臣汪志伊